

## Huntu

---

Desmantelashon di Antia Hulandes a resultá fututu pa corporate governance. Ta parse manera ku tur pais a kue nan propio rumbo. Riba su mes no tin nada robes ku esaki. Sí ta un mal kos ku no ta òf apenas ta traha huntu. Esaki ta sòru pa un skala di chènsnan perdí. E bon noticia ta ku un chèns perdí tambe ta brinda un posibilidat. Lagami duna un ehèmpel.

Den tur parti karibense di Reino ta difísil pa haña komisario- i supervisoran adekuá. Bo ta haña personanan ku sufisiente ekipahe pa loke ta trata contenido si, pero no na gran kantidat. Riba e islanan di mas chikí nan ta ménos ainda. Un falta di sufisiente eksperensia tambe ta un problema. Hopi biaha e problema di mas grandi ta e falta di independensia. Mas chikí e pais ta, mas tantu konekshon i relashon mutuo bo ta haña i mas tantu preferensia i desaprobashon komo konsekuensia di esaki. Esaki ta un karga pa independensia di e komisario. Mas i mas, independensia ta un kalidat esensial pa kada supervisor. Den kaso di institutonan finansiero, De Nederlandsche Bank ta mantené komo regla práktiko ku minimalmente mitar di e komisaronan mester ta independiente. Un di e kriterionan pa independensia ta loke nan ta yama 'independency in mind'.

Na nos paisnan, nos lo por promové e 'independency of mind' deseá di nos supervisoran hopi bon dor di atkerí komisaronan for di un otro pais den Karibe Hulandes. Promé ku Ministerio Públiko a traha un chukumpè di corporate governance na Boneiru aña pasá, tabatin diferente komisario i supervisor for di otro paisnan karibense aktivo na Boneiru serka entidatnan ligá na gobièrnu. Esaki tabata funshoná mashá bon.

Mi ta proponé pa tuma e bon ehèmpel akí ofer riba tur nos islanan i hasié algu struktural. Nos ta lanta un pool, por ehèmpel pa medio di un fundashon, di komisario- i supervisoran kompetente for di henter Karibe Hulandes. E paisnan ta komprometé nan mes mutuamente pa nombra, pa kada entidat ligá na gobièrnu, minimalmente un komisario for di un otro pais den Karibe Hulandes. Mas tambe tin mag. Nan por, pero no mester skohe for di e pool. Di e manera ei ta prevení endogamia (kada bia e mesun hendenan) i nos por siña for di otro. Además, pa e paisnan mas chikí i entidatnan públiko bo ta haña komisaronan kompetente disponibel mas fásilmente.

Por redusí e gastunan pa biahamentu (tempu, sèn i spesialmente esfuerso) dor di stipulá den e statutonan ku por presensia reunionnan via videoconferencing tambe. No ta semper esaki mester ta e kaso, pero lo no tin nada kontra si por ehèmpel, di seis òf ocho reunion, atendé tres via videoconferencing òf Skype.

Mesun kos nos lo por hasi ku esnan ku ta forma personal di institushonnan manera SER, Hunta Konsultativo, Kontrolaria General. Antes tabata rekrutá e miembronan di e kolegianan akí for di Antia Hulandes. Esaki tabata hasi nan komposishon diferente i e opinionnan refreskantemente distinto. E pool ku por a rekrutá for di dje tabata konsiderablemente mas grandi tambe. Kòrtiku bisá, solamente bentaha. Pa realisá esaki pa kolegianan aktual, mester di algu mas ku solamente kompartí komisario- i supervisoran. E Paisnan mester regla legalmente ku nan ta bai traha huntu riba e tereno akí. Esaki lo ta algu realmente tremendo. Ta e ora ei numa por bisa ku desmantelashon di Antia Hulandes tabata realmente eksitoso: si nos kuminsá traha huntu na un manera efektivu!

---